

## **Terengganu jangka industri pelancongan pulih seawal enam bulan**

**Astro Awani**

**11 Jun 2020**

**Nur Fazlizai Ali**

KUALA TERENGGANU: Kerajaan Negeri Terengganu menjangkakan industri pelancongan di negeri itu akan pulih secara berperingkat dalam tempoh enam bulan hingga dua tahun.

Menurut Pengerusi Jawatankuasa Pelancongan, Kebudayaan dan Teknologi Maklumat Negeri, Ariffin Deraman, ia antara sektor kedua terpenting di negeri yang kaya dengan produk pelancongan itu.

Katanya, Perintah Kawalan Pergerakan (PKP) yang dikuatkuasakan sejak 18 Mac lalu memberi kesan besar membabitkan pelbagai industri termasuk perhotelan dan sebagainya.

“Sebagaimana yang kita ketahui, industri yang paling terkesan atau antara paling terkesan adalah pelancongan.

“Jadi, apabila kerajaan tidak membenarkan rentas negeri, ia terus jatuh sehingga pendapatannya mencapai angka sifar.

"Ada setengah pemilik penginapan, persatuan menyelam dan pemain industri yang terpaksa mengurangkan pekerja mereka,” katanya.

Beliau berkata, penggiat industri pelancongan juga terpaksa menanggung kira-kira 30 hingga 40 peratus kerugian selepas tidak menerima pelancong selama hampir tiga bulan lalu.

Bagaimanapun, kata Ariffin, kebenaran rentas negeri yang diumumkan melegakan penggiat industri pelancongan.

Selain itu, tempahan hotel dan penginapan juga meningkat secara mendadak selepas kebenaran itu diberikan.

Ariffin turut menjangkakan ia akan terus meningkat pada hujung minggu ini.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/terengganu-jangka-industri-pelancongan-pulih-seawal-enam-bulan-246634>